




Reykjavíkurborg  
Skóla- og frístundasvið

Reykjavík, 29. nóvember 2018  
SFS2018110109

7.1

218110260

Ráðhús Reykjavíkur  
Borgarráð



**Efni: Meðferð umsókna í Arnarskóla**

Á fundi skóla- og frístundaráðs þann 27. nóvember 2018 var lagt fram minnisblað sviðsstjóra skóla- og frístundasviðs, dags. 23. nóvember 2018, um meðferð umsókna foreldra reykvískra nemenda í sjálfstætt rekna sérskólann Arnarskóla.

Lögð fram svohljóðandi málsmeðferðartillaga skóla- og frístundaráðsfulltrúa Samfylkingarinnar, Viðreisnar, Pírata og Vinstri grænna:

Skóla- og frístundaráð samþykkir með vísan til minnisblaðs sviðsstjóra, dags. 23. nóvember 2018, meðferð umsókna foreldra reykvískra nemenda í sjálfstætt rekna sérskólann Arnarskóla vegna skólaársins 2019 -2020.

Tillaga sviðsstjóra skóla- og frístundasviðs var samþykkt.  
Tillögunni er hér með vísað til borgarráðs

Virðingarfyllst

Helgi Grímsson

sviðsstjóri skóla- og frístundasviðs

Hjálagt:  
Minnisblað, dags. 23. nóvember 2018



## MINNISBLAÐ

**Viðtakandi:** Skóla- og frístundaráð

**Sendandi:** Helgi Grímsson, sviðsstjóri skóla- og frístundasviðs

---

***Efni: Meðferð umsókna foreldra reykvískra nemenda í sjálfstætt rekna sérskólann Arnarskóla***

Arnarskóli er nýr sjálfstætt rekinn sérskóli fyrir börn með þroskafrávik. Skólinn býður upp á heildstæða skóla- og frístundaþjónustu fyrir börn með þroskafrávik á grunnskólaaldri. Í heildstæðri þjónustu felst að veitt er samfelld þjónusta allan daginn, allan ársins hring. Starf skóla, frístundar og sumarfrístundar er fléttað saman í eitt heildstætt úrræði. Lögð er áhersla á atferlisíhlutun þar sem atferlisfræðingar þjálfa starfsfólk og samræma vinnubrögð. Engin ákveðin greining er forsenda skólavistar og eru allar umsóknir teknar til athugunar.

Þar sem skólinn er staðsettur í Kópavogi hefur hann gert þjónustusamning við Kópavogsbæ og hefur fengið viðurkenningu sem einkaskóli á grunnskólastigi frá Menntamálastofnun en viðurkenningin byggir á þjónustusamningnum við Kópavogsbæ.

Foreldrar sem óska eftir skólavist í Arnarskóla fyrir barn sitt sækja um á sérstöku eyðublaði og metur skólinn hvort Arnarskóli sé hentugur fyrir barnið. Telji skólinn að hann henti barninu leiðbeinir hann foreldrum með hvað þeir þurfa að gera til að sækja um hjá sínu sveitarfélagi.

Arnarskóli er viðbótar valkostur fyrir þau börn og foreldra sem skólinn metur að hann henti fyrir. Á heimasíðu skólans er ekki að finna reglur um inntökufærli, inntökuvíðmið í skólann né á hverju mat skólans er byggt hvort hann henti eða ekki. Í þjónustusamningi skólans við Kópavogsbæ, dags. 2. maí 2018, kemur fram að skólinn sé opin nemendum með einhverfu eða önnur þroskafrávik, sem þurfa einstaklingskennslu og/eða stuðning stóran hluta skóladagsins til að þess að læra og dafna. Inntökuteymi skólans meti hverja umsókn í samvinnu við skólafyrirvöld í lögheimilissveitarfélagi nemandans. Sérstaklega sé horft til þess hvort skólinn geti mætt þörfum nemandans með þeirri þjónustu sem hann býður upp á. Hver umsókn sé metin á grundvelli fyrirliggjandi upplýsinga og mati fulltrúa skólans á nemandanum.

Aðrir möguleikar foreldra barna með alvarlegar þroskaskerðingar sem óska eftir sérúrræði fyrir barn sitt eru að sækja um í sérúrræðum Reykjavíkurborgar, sem eru Klettaskóli, sérhæfðar sérdeildir fyrir nemendur með einhverfu og Brúarskóli. Sérstakar reglur gilda um innritun og útskrift nemenda úr þessum sérúrræðum borgarinnar og hafa þær reglur fengið staðfestingu ráðherra.

Nú eru fyrirbyggjandi hjá skóla- og frístundasviði þrjár beiðnir um að Reykjavíkurborg greiði framlag vegna skólavistar í Arnarskóla fyrir nemendur með þroskafrávik úr Reykjavík. Tveir þessara nemenda eru nú í almennum skólum og hefur ekki verið sótt um skólavist fyrir þá í sérúrræði eða sérskóla í borginni. Einn nemandi er nú í sérhæfðri sérdeild fyrir nemendur með einhverfu. Það er mat foreldra þessara barna að Arnarskóli henti þeim svo og er það mat skólans að hann henti þessum börnum. Þessi börn hafa því fengið skólavist í skólanum með fyrirvara um greiðslu framlags borgarinnar til skólans. Í einhverjum tilfellum hafa foreldrar, sem sóst hafa eftir/íhugað skólavist í Arnarskóla fyrir barn sitt, fengið þá niðurstöðu skólans að hann henti ekki þeirra börnum og hafa því ekki borist beiðnir um aðkomu skrifstofu skóla- og frístundasviðs að þeim málum varðandi greiðslu framlags til skólans.

Þær beiðnir sem borist hafa vegna skólavistar í Arnarskóla benda ekki til áhuga foreldra barna sem nú eru í Klettaskóla á að flytja börn sín yfir skólann. Vísbendingar eru hins vegar um að frekar sé um að ræða beiðnir vegna barna sem eru nú í almennum skólum. Engin beiðni hefur enn borist vegna barns sem er að hefja grunnskólanám.

Við mat á kostnaði annars vegar fyrir skólavist í Arnarskóla og hins vegar í Klettaskóla þarf að taka tillit bæði til þeirrar þjónustu sem skólarnir hafa upp á að bjóða og einnig til þeirrar aðstöðu sem þeir hafa fyrir nemendur sína. Samkvæmt upplýsingum frá fjármálaskrifstofu SFS er kostnaður nú vegna skólavistar nemanda í Arnarskóla kr. 13.136.340- á ári. Í þeirri tölu er kostnaður vegna skólastarfs, frístundar á starfstíma skóla og sumarfrístundar. Heildarkostnaður vegna skólavistar nemanda í Klettaskóla frístundar þar og sumarfrístundar er kr. 13.879.800- á ári.

Arnarskóli er staðsettur að Kópavogsbraut 5C í húsnæði sem er í eigu Landspítalans sem hýsti áður Kópavogshæli. Húsnæði skólans er því ekki hannað og byggt sem skólahúsnæði en aðlagð að þeirri einstaklingsmiðun sem skólinn vinnur samkvæmt. Klettaskóli er í húsnæði sem hannað er og byggt sem skóli og hefur verið endurbætt og aðlagð þeim nemendahópi sem þar er. Í skólanum er m.a. sérhönnuð sundlaug fyrir fatlaða, íþróttahús, mötuneyti, list og verkgreina aðstaða, sérhannað skynhreyfirými og aðstaða til sjúkraþjálfunar

Reykjavíkurborg hefur í samstarfi sínu við sjálfstætt rekna skóla gert þjónustusamninga við þá skóla sem staðsettir eru í borginni en jafnframt sett þak á nemendafjölda úr borginni í hvern sjálfstætt rekinn grunnskóla innan og utan borgarinnar.

Lagt er til að viðhaft verði eftirfarandi ferli við afgreiðslu beiðna um framlag Reykjavíkur vegna umsókna um skólavist í Arnarskóla vegna nemenda með lögheimili í Reykjavík:

Reykjavíkurborg greiðir skólakostnað/framlag í Arnarskóla fyrir tilgreindan fjölda nemenda með lögheimili í Reykjavík á hverju skólaári. Um er að ræða nemendur með alvarleg þroskafrávik sem hafa veruleg og íþyngjandi áhrif á nám og skólagöngu þeirra. Um er að ræða nemendur með:

- verulega hamlandi þroskahömlun og/eða einhverfu ásamt alvarlegum atferlis- og hegðunarröskunum og/eða öðrum alvarlegum viðbótarröskunum s.s. íþyngjandi ofvirknishegðunarröskun og geðrænar raskanir.

Sérstakt matsteymi leggur mat á þær beiðnir sem berast til SFS. Í matsteyminu eiga sæti skrifstofustjóri grunnskólaskrifstofu, verkefnastjóri sérkennslu á fagskrifstofu grunnskóla, fulltrúi viðkomandi skólaþjónustu og fulltrúi frá einu af sérúrræðum

borgarinnar sem við á hverju sinni, Klettaskóla, Brúarskóla eða sérdeild fyrir nemendur með einhverfu.

Matsteymið tekur mið af:

- Fyrirliggjandi greiningum um þroskaröskun barnsins.
- Mati á stöðu barnsins í námi og skólastarfi frá leik- eða grunnskóla.
- Mati annarra sérfræðinga/aðila sem hafa komið að málum sem varða leik- eða grunnskólagöngu barnsins.
- Óskum foreldra og nemandans að teknu tilliti til aldurs og þroska.
- Mati starfsfólks Arnarskóla á því hvernig aðstæður og möguleikar skólans séu líklegar til að hæfa þörfum viðkomandi barns.

Starfshættir matsteymis:

- Matsteymið gætir ávallt jafnræðissjónarmiða í störfum sínum við mat og afgreiðslu beiðna.
- Matsteymið getur kallað til sín sérfræðinga um nám og skólagöngu barna með þroskafrávik og sérfræðinga varðandi þroskafrávik viðkomandi barns. Foreldrar skulu hafa kost á að hafa áhrif á val á sérfræðingum.
- Matsteymið getur falið sérfræðingi úr teyminu að fylgjast með barninu í núverandi aðstæðum þess í leik- eða grunnskóla, enda hafi foreldrar samþykkt slíkt.
- Séu beiðnir fleiri en fjöldi þeirra nemenda sem heimild er fyrir í skólann, forgangsraðar matsteymið beiðnum eftir því hve hamlandi skerðingar viðkomandi barns eru í námi og skólastarfi.
- Afgreiðsla matsteymis skal liggja fyrir eigi síðar en einum mánuði eftir að beiðni berst.

Afgreiðsla beiðna:

Skrifstofustjóri fagskrifstofu grunnskóla tekur ákvörðun um samþykki eða synjun beiðna á grundvelli fyrirliggjandi gagna, upplýsinga og athugana matsteymis.

- Sé beiðni um skólavist samþykkt tilkynnir skrifstofustjóri fagskrifstofu grunnskóla það í bréfi til foreldra.
- Sé lagt til að beiðni um skólavist verði synjað tilkynnir skrifstofustjóri fagskrifstofu grunnskóla það í bréfi til foreldra þar sem ákvörðun um fyrirhugaða synjun er rökstudd ítarlega. Gefa skal foreldrum kost á að tjá sig um fyrirhugaða synjun.
- Sé ákvörðun tekin um synjun að loknu mati á athugasemdum frá foreldrum tilkynnir skrifstofustjóri grunnskólaskrifstofu það í bréfi til foreldra. Ákvörðunin skal vera rökstudd og foreldrar upplýstir um kærurétt skv. 47. gr. laga um grunnskóla nr. 91/2008.
- Sé beiðni synjað þar sem heimild vegna fjölda nemenda í skólann er fullnýtt skal foreldrum gefinn kostur á að halda beiðni sinni um skólavist í Arnarskóla virkri til umfjöllunar síðar.

Miðað verði við að umsóknum um framlag vegna skólavistar í Arnarskóla verði skilað til skóla- og frístundasviðs fyrir 1. mars 2019 og að umsóknir vegna komandi skólaárs 2019 -2020 verði afgreiddar fyrir 15. apríl 2019.

Fyrirliggjandi umsóknir vegna yfirstandandi skólaárs verði teknar til skoðunar með tilliti til framangreinds verklags og þess að nemendur geti farið í Arnarskóla á næsta skólaári.